

Zu wissen allezeit reggen des iars oder schön so wartt in welcher stund
der Monnew an dem himel sey. in welcher stund tags oder nachtes.
Alls dann da vor geschribenn stat. So wartt welcher planet regiert vnnder
dē sibenn planeten

SUNN

Ist es das die Sunn regiert vnnder den sibenn planeten. So wißs das
der monat wirt heiß vnnd auch dürr nach den vyer zeitem des iars.
Wann des planeten füerer ist der Leo vnnd sein natur

MON

Ist das new in dem planeten Luna So wirt der monat windig vnnd
dürr. vnd auch ains tails reggen. Wann sein füerer ist der Krebs der ist
kalt vnd feucht als das wasser

SATURNUS

Ist aber das new in dem planetē Saturnus. So wirt der monat heiß
oder kalt nach dem iar vnd halbes reggen. Wan sein füerer ist der Stain
bock vnd der Wasserman. Wann der Stainbock ist genattirt als das feuer
Vn der Wasserman als der luft. Vnd Jupiter gemischet auff beydensittē

MARS

Ist das new in dem planeten Mars. so wirt ain tayl reggen. vnd ain tail
dürr. Wann sein füerer ist der Wider. vnd der Scorpion. wan der Wi
der ist als das feuer vnd der Scorpion als das wasser

MERCURIUS

Ist das new in dem planeten Mercurio. So wirt es in dem monat vil
regen. Wann sein füerer ist die Junckfraw vnd der Zwiling. Wan der
Zwiling ist als der luft. Vnd die Junckfraw als die erden

JUPITER

Ist aber das new in dem planeten Jupiter. so wirt der monat halber
trucken. vnd halber gemischt mit winde vnd regen. Wan sein füerer ist
der Schütz vnnd die Fisch. Wann der Schütz ist alls das feuer. Vnnd die
Fisch alls das wasser

VENUS

Ist das new in dem planeten Venus. So wirt der monadt seer heiß
vnnd dürr. oder kalt. Vnd auch das viertail des iars allwegen reggen
Wann ir füerer ist der Ochs vnnd die Wag. Wann der Wage natur ist als
der wind. vnd der Ochs als die erden. Also ist der monat gemischt von den
beiden. Von dem wind vnd auch von dem wasser